

北鎮縣志



卷五

人事

古者風同道一學者非先王之法服不敢服非先王之法言不敢言其時和親康樂國無紛歧之政家無異同之俗甚盛事也北鎮屬古幽州域遠在荒服先王邇治之隆未及親見而今之縣境煙井櫛比村落星羅者率多自他處移殖而來漢滿蒙回互相雜居職業或世守其舊習尚或各從其宜此其大凡也然而為士則誦詩書農則安耕鑿工遵高曾之矩矱商利懋遷乎有無則又各競所同然而無自為風氣者於以見先聖之教澤浸淫漸漬入人者深矣志人事第四



人類

漢族

漢族黃色種人蒙古利亞之一其初繁殖於黃河流域黃帝擒蚩尤遂驅苗族而代有中夏漢武帝征討四夷聲威遠播魏晉以來人稱中國為漢此漢族之名所由來也明清交戰廣寧久經兵燹民多遷徙及清世祖定鼎燕京撥內地各省人民來墾斯土願投旗者編入漢軍冊檔不願投旗者另編民籍三百年來生聚日繁今居全縣戶口十分之七八原籍直隸最多山東次之山西河南之人亦間有之惟為數甚罕

滿洲

滿洲即通古斯族起源於長白山迤東濱海等處周之肅慎秦及前漢之東胡後漢之鮮卑隋唐之靺鞨唐之契丹宋之女貞皆屬此族其族強健善戰屢侵中原迨遼金兩朝佔據中原北部誠為強國清太祖努爾哈齊崛起建州統一諸部國號滿洲後改國號曰清滿洲遂為部族之稱世祖定鼎燕京分滿洲兵駐防各處廣甯駐防滿洲兵三百六十五名撥給隨缺田畝聚族於斯三百年來生齒繁息戶口居縣境十分之一二

### 蒙古

蒙古即蒙兀之轉音又名韃靼族漢之匈奴唐之突厥室韋皆屬此族元太祖成吉思汗開基漠北奄有中原武力且侵入歐洲實

為蒙古最勝時代元滅後勢力就衰清世祖撫定燕京凡蒙古之前後歸誠者編為八旗軍制與滿洲同駐防各處廣甯駐防者除滿洲漢軍外設有蒙古兵七名撥給伍田世守其職是為蒙古旗人又有錫伯人為蒙古之一種亦曰錫伯旗人縣境閭陽驛四方台韃子營等處多有之其他村屯則不數覩焉

### 回族

回族或以為即唐之回鶻又曰土耳其族原居天山南路及中亞細亞地崇信謨罕默德教所謂謨罕默德者即非罕怕爾音之訛也隋開皇中始傳其教於中國迄元時其人徧於四方皆守教不替所至親善又有謂清高宗時大將軍岳鍾琪征青海隨大軍入

境散居各地縣城南關該族建有禮拜寺家於附近及閭陽驛頗  
多中安堡溝帮子等處亦有之縣境約共二百二十餘戶



# 戶口

縣境清初戶口甚稀康熙三年始設縣治戶無舊籍丁鮮原額招民開墾三年起科每丁徵銀二錢至二十年原額並新增實在行差共二千四百五十六丁徵銀四百九十一兩二錢至雍正十二年原額並新增實在行差共三千八百九十二丁徵銀七百七十八兩四錢二分當時戶口尚無冊籍至乾隆時始將民籍戶口編成冊籍旗人戶口歸佐領管轄另編冊檔嗣後旗民戶口歲有增加迄今二百餘年竟增至三萬八千二百四十六戶男女共二十四萬四千零三十口雖由休養生息所致而直魯之人接踵遷入亦一大原因也茲將民國十四年度調查城鄉戶口數目列表如

左

全境戶口一覽表

區別	戶數	男口數	女口數	男女共數
城內	三三五六	七一七二	六五八六	一三七五八
第一區	二五〇三	七四三九	七二〇七	一四六四六
第二區	五〇〇三	一七一六七	一六六五四	三三八二一
第三區	五五三二	一五九三〇	一五二二〇	三一一五〇
第四區	四四八九	一三八一二	一二六五一	二六四六三
第五區	六一四三	二六九一八	二六〇〇四	五二九二二
第六區	四五八九	一五〇三四	一四七三四	二九七六八
第七區	二九〇九	九五八八	八八一	一八三九九

第八區

三九一八

一一九八八

一一一二一

二三一〇九

總計

三八二四六

一二五〇四八

一一八九八五

二四四〇三〇

明說

氏族

孟氏 原籍山東亞聖之裔清初徙居縣境世代書香遺澤綿遠  
清光緒間孟憲彭恩貢生以直隸州州判用世居城南孟家窩堡  
陶氏 即瓜爾佳氏前清時一族世襲滿洲正白第一旗佐領一  
族世襲滿洲正白第三旗佐領均世居城內

佟氏 即佟佳氏滿洲旗人清開國勲臣之裔光緒間佟喜亭官  
陝西補用知府佟午亭舉人候選知縣世居城內

趙氏 原籍新民朝北營子清季徙居縣城光緒間趙成善官廣  
西平樂府知府子錫桐官陝西布政使孫履泰遇缺即選知縣現  
居城內

汪氏 清漢軍旗人乾隆間汪繼圖居瀋陽任員外郎兼佐領其  
姪四格任員外郎兼佐領田格任三等侍衛永保任郎中兼佐領  
道光間遷居北鎮三皇嶺側

## 宗教

縣境昔時僅有釋道兩教後有回教耶穌教次第流入按釋氏主慈悲道家言感應耶穌倡博愛回教講清真誰宗旨不同而勸人為善則一也宗教感化之力足濟道德法律之窮惡可厚非茲將各種宗教臚舉於左

## 佛教

佛教一名釋教教祖釋迦牟尼生於吾國周靈王時父淨飯王為北印度迦毘羅城主母摩耶夫人初奉婆羅門教喜息深林中冥求真道以未能脫陰生老病死之四苦遂持厭世主義年十九逃入雪山學道數年始得正覺遂出而說法凡四十餘年年八十示

寂世稱釋迦牟尼以釋迦為氏牟尼賢者之義其教以博愛普濟  
為主旨佛滅後弟子五百人大會於王舍城編纂經典後百年佛  
弟子七百人又大會於毘舍離當時佛教勢力尚未出恒河流域  
及北印度阿育王崇拜釋氏定為國教會僧侶千人於國都華子  
城且派教師傳教各國由是佛教大昌漸由中亞細亞傳至葱嶺  
以東適東漢明帝夜夢金人遣蔡愔等求佛法於西域至大月氏  
得佛經及僧人迦葉摩騰竺法蘭以歸是為佛教入中國之始教  
徒初來止於鴻臚寺遂名所居曰寺魏晉之際高句麗建國始聘  
西僧宏通釋典是為佛教入遼東之始遼金元起北方皆崇拜釋  
氏滿清入關佛教與儒道同尊於其支流喇嘛教尤深信仰太宗



時喇嘛來獻丹書預告天下一統及征察哈爾還喇嘛默爾根隨至盛京勅建實勝寺居之即今俗呼黃寺者是也女子出家者內典謂之比邱尼俗呼尼姑所居蘭若曰菴縣境有佛教無喇嘛教比邱尼亦有之及清末變法廟宇間有改建學校及各項辦公宿舍者是亦佛教之一浩劫也鼎革後南京寄禪和尚首倡組織中華佛教總會以為佛門護法各省立支部各縣立分部國家尋頒行管理寺廟條例凡十方選賢傳法剃度各叢林寺廟有關名勝者法律負保護之責僧道戒行高潔昌明教義者國家並表揚之由是佛教復盛本縣全境寺廟數十處僧侶數百人焚香念佛可謂盛矣

道教

道教一名闡教以老子為教祖老子姓李名耳字伯陽謚聃故亦稱老聃周守藏室之吏也所著道德經五千餘言亦名老子及戰國時莊周著莊子十餘萬言其要歸本於老子故老莊並稱其教以清淨無為為宗旨漢初道教盛行如留侯辟穀欲從赤松子遊陳平曹參皆好黃老術至武帝好神仙信封禪文成五利之徒相與炫惑於是煉丹服食之說熾而道家本旨失矣後留侯八世孫張道陵復以道術相傳授子孫世守其業號為真人其後丹鼎符錄占驗各派紛然雜出無不託之道家就中以葛洪為最著抱朴子神仙傳等書行世從前道教僅行南方北方之有道教則自長

春真人至北京始真人姓邱名處機號長春子南宋人從王重陽學得先天大道元太祖召之往見於雪山以天道好生不嗜殺人為諫太祖重之尊為國師建長春宮居之弟子十八人隨地布教道以大顯號龍門宗今中國北部道流皆其法嗣滿清開國郭真人望氣東來預示龍飛之讖世祖入關勅建太清宮於瀋陽如元太祖長春宮故事遼東道教從此大昌教徒散居四方隨處立廟清末佛教凌夷道教同受影響及南京組織佛教會瀋陽太清宮方丈葛月潭同時發起道教會總會設於北京白雲觀各省並設分會道教復興女子入道者曰女冠始於漢時俗曰道姑別有火居道在家畜妻子號靈寶宗除誦經理懺外別無所事蓋道教之

未流也縣境道士最多大居道次之女冠最少

### 回教

回教一名天方教教祖穆罕默德阿刺伯人少聰明有大志年四十始參酌猶太基督二教別創新教曰回回教專拜造物主不信他神其經典可蘭經穆罕默德左手持經典右手持利劍專以武力傳教四方遂奄有阿刺伯地建大食國神權政治以教主為元首穆罕默德卒繼其後為教主者稱哈刺發神嗣之義哈刺發欲廣傳新教於域外西畧非洲東侵波斯統一西亞細亞遣使通好於唐中亞細亞及天山南路一帶以次轉入回教勢力範圍嗣後漸入中國居東省者曰東干派所居之地皆建禮拜堂曰清真寺

教師曰阿衡每歲有兩大主麻節每七日值牛婁鬼亢四宿為主麻曰主麻者禮拜之義屆期教徒咸入寺誦經祈禱其婚喪禮儀亦與他族異婚禮結婚於寺由教主立婚書乃成禮喪禮延阿衡誦經祈禱浴尸畢以白布裹之三日殯不具棺槨鼻置壙中謂之土葬封如馬鬣形其俗禁豚肉忌烟酒食獸必反芻者取其潔也縣境回民約百餘戶而城裏大佛寺前為最多並小南門外建有禮拜寺以便祈禱回漢兩教蓋亦有同化之雛形焉

### 天主教

天主教即基督教舊派一名加特力教中國人稱為天主教教祖耶穌基督猶太人生當我國漢哀帝時或曰漢平帝元始元年三

十歲宣傳福音以基督自任基督者救世之義教旨在博愛教徒甚多猶太人惡之控之羅馬官吏耶穌遂死於十字架後數百年其教風行歐洲幾遍各國當唐太宗時波斯人阿羅本賈其經典入中國太宗信之建波斯寺當時目為景教至武宗時與佛教並禁明成祖靖難後因訪建文帝踪跡遣太監鄭和馮保通西洋天主教徒隨入中國世宗時利瑪竇來華傳教大學士徐光啟首奉之清聖祖時以南懷仁湯若望佐定曆象有功許外人傳教准於通商口岸建設教堂宣宗因阿片交涉復禁傳教及文宗北狩英法聯軍入京恭親王與定條約許其在內地傳教同治初法蘭西人始傳天主教於各省本縣有天主教亦自此時始先於城東大

顧屯築天主教堂一所嗣又在本城鼓樓胡同築天主堂一所每星期聚教徒禮拜謂教師為神甫附設男女學校以宏教旨

### 耶穌教

耶穌教即基督教新派基督教原分三派曰天主曰希臘曰耶穌同以耶穌基督為主教當十六世紀日耳曼人馬丁路得反對羅馬教皇專制乃倡宗教革命別創新教曰耶穌其教旨沿舊教而脫其桎梏教士無階級牧師得畜妻子一時信者靡然風從而大不列顛鎮國人信仰尤甚當時新舊教徒門戶水火迭起戰爭及近世信教自由其禍始息耶穌教在清同治時始入中國北部其傳至東省最晚光緒二十一年本縣始有英人於縣城十字街建

講書堂三十一年又於大東街建禮拜堂每星期聚教徒禮拜信者日衆自民國成立則見少矣現在該教堂以英國牧師很維禮主政並於教堂後身設有崇德學校今改名曰崇一學校內分初中高小初小三級凡信教與不信教者之子弟一律收容不分畛域此亦一視同仁之義也



禮俗

縣境風俗淳樸殊少詐虞惟好古特甚故一切禮文多沿舊制近來人羣進化風俗改良如男子早婚婦女纏足種種陋習已漸稀少惜未能淨盡耳至婚喪之禮尚有未能遽改者亦積習使然茲將禮儀風俗附錄於後

婚娶

古者婚禮有六納彩問名納吉納徵請期親迎今人猶沿襲之議婚之先須以媒妁介紹聯二姓之好結百年之緣然後求庚卜吉俗謂合婚即古問名之義婚期由術者擇定男家用紅箋書男女年庚嫁娶日時及從俗禁忌諸事於兩月前通知女家俗謂通信

即古請期之義及一月前後男家復諏吉備豚酒服飾等物納之  
女家是為納幣俗呼過禮即古納徵之義親迎前一日女家送妝  
奩什物於男家曰安嫁裝富室動費千金貧家亦多寡不等翌日  
清晨男家備彩轎或彩輿鼓樂導前新婿同喜儂四人俗呼娶親  
客娶親娘一人同至女家親迎新婿登堂拜女父母俗名謝親即  
古奠雁之義候吉時升轎女家亦聘四人為儂俗呼送親送親  
娘一人送至男家新娘下轎紅毡鋪地踏行其上至堂前設喜桌  
曰天地桌夫婦交拜訖婦入室向吉方端坐名曰坐帳俗呼坐福  
喜娘為新婦櫛髻俗呼上頭女家肆筵款婿有古館甥遺意俗為  
館大小飯皆借男家酒穀以行具文而已是日男家設筵以款賀

客戚友各出銀錢贈男家曰喜儀贈新婦曰拜儀是夕新婿新婦對坐交盃飲酒即古合卺之禮翌日晨新夫婦同拜先祖及舅姑以次拜宗族前輩俗謂分大小即古廟見舅姑之禮長者贈新婦以資曰拜錢七日或九日女家接女及婿至家俗曰回酒逾月新婦歸寧謂之住對月此舊婚禮之大畧也惟親迎之禮需費多金僅富家行之餘皆女至婿門始見其俟著俟堂而已近年官紳之家間有倣西式行文明結婚禮至平民之家則悉仍舊制

### 喪葬

喪葬之禮舊制相沿隆殺視貧富為之當疾革時舁置牀上子孫環守候氣絕以珠納口中以帛蒙面上然後以衾斂之即古之小

歛禮男停正寢女停內寢長子主喪登門限而呼者三俗曰指冥  
路有古泉復之義繼此易繅舉哀遣人携壺漿燃籠導於前子孫  
隨之哭至附近神祠焚香化楮俗謂報廟即日通知親友弔者至  
喪主及家人皆稽顙謂之行孝至三日納尸於棺即古之大斂禮  
停柩在堂是日晡時喪家具各種冥器鼓樂導前僧道誦經喪主  
執帚退行引魂詣神祠焚化祭奠謂之接三禮畢而返喪主寢苦  
枕塊於柩側柩前置一盂每食貯飯少許即儀禮設熬之義並置  
長明燈晝夜不息子孫朝夕哭奠傾觴焚化紙箔謂之焚冥楮七  
日黎明設祭於庭子向空哭奠俗謂上望蓋取來復之義即梵經  
所載上望鄉台之說自是每逢單七之日哭奠酒殽謂之辦七至七

七而止百日亦如之卜期啟殯或遠或近惟吉是從殯期既定預先印白紙帖詳具死者履歷生卒年月日時及發引期謂之訃文遍至戚友葬前三日領帖俗謂開吊設靈棚備冥器並置銘旌於棚外戚友贈輓幛輓聯皆懸棚內次日延僮禮祭並請有德望者為題木主俗謂之成主發引前一夕家奠畢戚友以次主奠謂之辭靈翌晨發引銘旌前導儀仗隨之喪主執幡行於前女眷乘輿哭於後戚友徒步或送出里門或至於郭喪主稽顙致謝戚友乃還至墓地先祀后土乃窆柩喪主率家人設奠致祭乃返葬後三日喪主詣墓哭奠培土於塚俗謂圓坎百日復詣墓哭奠小祥大祥亦如之禫祭今廢此喪禮之畧惟官紳富家行之若貧家則卒後三

四日即葬除接三外別無儀文近年風俗雖稍有變更惟喪禮悉仍其舊

附舊服制 本宗五服父母斬衰三年父在母歿齊衰三年祖父母齊衰杖齊曾祖父母齊衰五月高祖父母齊衰三月伯叔父母期服次小功次總麻兄弟期服次大功次小功次總麻妻為夫斬衰三年夫為妻齊衰杖期父母在不杖子期服孫大功服曾孫小功服玄孫總麻為人後者及出嫁之女俱降本服一等外戚服制諸姑姊妹出嫁者皆降本服一等外祖父母及舅俱小功姨及中表兄弟俱總麻餘無服民國喪儀未定仍沿用此制

祭祀

祭祀之禮滿漢不同要皆以祀先為重漢人世家巨族設立宗祠  
歲時致祭陳俎薦新如儀庶人奉木主而祭於寢祭禮雖未必如  
儀而恪恭祀事則一也此外普通所祭之神有天地竈神財神門  
神等就中以竈神為最每歲十二月二十三日為祀竈之日至張  
仙南海大士亦間有祀之者每歲除祭天地諸神及祖食素三日  
朝夕焚香其餘令節如上元端午中秋等均焚香叩拜每月朔望  
亦如之清明及七月十五日十月初一日均詣墓祭掃布奠酒漿焚  
化香楮此漢人祭祀之禮也滿人則異是祭祀皆設版神竿祭以  
豕黎明陳几於地置牲於楹主祭者焚香迎神灌酒牲耳鳴振謂  
之領牲猶言神已領牲默示歌享之義漢人有時倣行之如禱疾

而愈願遂乃舉俗稱還願但不設神版神竿耳此皆家人祭祀之常禮至於神廟前清載有祀典者為孔子關帝文昌城隍諸神每月朔望地方官紳往拜之其不在祭典之例猶不堪枚舉民國肇興重定祀典其不廢猶存者文廟孔子武廟關岳合祀而已

附報賽 歲時祈報演戲酬神謂之報賽如祈雨謝降之類或於農隙之時演劇三五日亦曰賽社有古蜡遺風他若春秋二社鄉人聚會焚香奠酒以祭社神祭畢相與共食謂食神餘又有定期賽會本境東嶽廟三月二十八日會期士女赴會者絡繹不絕酒樓茶社雜貨攤床均賃地作臨時營業廟東為說書賣藝之場遊人麇集其東南為賽馬場會期好馳馬者齊來騁賽以爭勝負觀



者如堵遠如内外蒙古不憚跋涉虔心祈禱者亦接踵而來甚有  
一步一料頭至廟而止不以為苦者雖屬迷信其廟會之盛亦可  
概見

### 宴會

宴會之禮有幽風鄉飲之義尋常宴會多在春初謂之春酒臨時  
宴會如洗塵餞祖之類則無定期諸凡宴會先由主人治酒醴具  
柬帖定期邀賓屆期賓至主人恭迎堂下揖讓而升有古禮拜迎  
之義賓齊肆筵設席請賓入坐以長幼序此鄉間則然若城內則  
不專序齒似有貴貴尊賢之義由主人書衆賓姓字布之坐次依  
次就坐主人酌酒獻賓賓酢主人互相致敬其食品率用五鼎八

簋俗稱八中碗五大件以燕窩銀耳為上品魚翅次之海參又次之此城內官紳宴會若鄉間宴會則不過雞豚及山穀野蔬而已城鄉奢儉之不同即亦可概見近年生活程度日高外洋食品輸入者日多如波蘭地香櫟等酒價值雖昂富紳達官每逢宴會必備此酒以伸敬禮至番菜本城尚未用者凡喜慶事宴會來賓席間樂工作樂庖丁獻脯(俗稱獻肉)眾賓賞錢相沿成俗耳

### 民風

漢書地理志云遼東地廣民稀箕子教其民以禮義田蠶織作其民終不相盜無門戶之閉婦人貞吉金史云舊風淳直其祭天地敬親戚尊者老接賓客信朋友禮儀款曲皆出自然元志云性悍

善騎射明一統志云人多僑居俗各異好性淳實務農商習文禮  
清盛京通志云賦性質直亦習文藝又云士勵廉隅民安勤儉總  
觀歷代史乘所載本境民風亦可概見然世運屢有升降民俗不  
無變遷又安知今不異古所云耶查縣城附近居民賦性明敏多  
業儒服賈且善於交際西北兩部山嶺縱橫民情渾樸多務農林  
東南兩部河流環繞民情精勤多習文藝全境女子昔時除績紡  
縫紉而外別無職務今則女學倡明入校讀書者所在多有正內  
正外之限較前稍寬間有能獨力生活者一洗從前依賴之性此  
近日民風之大概也

歲事

夏曆正月朔為元旦前一日設香案於中堂陳列祭品燃燭焚香先祭先祖竈神亦如之至夜間子時查閱曆書出門向喜貴財等神方位焚香叩拜並燃爆竹謂之接神接神畢煮水餃食之謂之元寶湯亦有不食黎明起戚友互相投刺拜謁曰賀歲由元旦(即春節)至初五日每日朝午夕三次焚香叩拜商民無大異(商戶供財神工人供祖神)商家休息五日至初六日開市彼此往來祝賀如賀歲儀十五日為上元節俗呼元宵節由十四至十六張燈結彩街市間辦演雜劇如龍燈高脚獅子旱船等沿街蹈舞俗謂唱秧歌即古鄉人儺之意遊人雜沓攘往熙來至夜分乃止惟十五日晚間各家食湯團謂之元宵二十五日為天倉日農人及米店

盛飯一盂納倉廩焚香拜祭俗謂填倉二月初一日為中和節初二日龍台頭日時當驚蟄前後為龍蛇始振之期各家由庭中撒灰道經大門至井沿俗謂領龍是日多食春餅至夜燃燭於室中暗處名為照蟲燭初十日為花朝百花生日也清明前一日為寒食節取禁烟之義清明插柳今改植樹節家家掃墓焚化冥楮三月初三日為上巳古人修禊之期人多至郊外踏青二十八日為天齊廟會四月初八日為佛誕節十八日為娘娘廟會即碧霞元君廟婦人無子者多於是日禱之二十八日為藥王廟會五月初五日為端陽節今改夏節家家食角黍飲雄黃酒插艾門首以辟毒癘小兒繫五色絲於臂謂之續命縷午飯開盛宴六月初六日

祭蟲王又為曝書曬衣之日七月初七日為乞巧節女兒穿針乞巧是夜為乞夕俗謂牽牛織女相會之期十五日為中元節家家掃墓是夜僧道建醮曰盂蘭盆會放河燈以超度枉死之魂八月十五日為中秋節午飯開盛宴月初升時陳瓜果月餅於庭焚香叩拜以祭太陰俗稱供月九月初九日為重陽節携酒登山俗稱登高十月初一日為報賽節亦稱鬼王節家家掃墓焚化冥楮俗謂送寒衣十二月初八日為臘八日黃米豆為粥曰臘八粥二十三日俗稱小年家家以糖祀竈除夕卑幼以序向尊長行禮謂之辭歲歲事畢矣

慈善

蕭永儒 字鴻林天性慷慨家資豐富救困恤乏戚族稱頌遇公益事尤熱心捐助清光緒乙巳城內設兩等小學校助學田百餘畝嗣於本村創設小學校一處女子小學校一處前後助款數千元畢業升學者百餘人嘉惠學子良非淺鮮其他急公好義之舉難以縷指有子三長露恩前充奉天省議會議員李露華歷充陝西河南等省地方檢察廳廳長所至政聲卓著現充吉林檢察廳廳長王丙炎 字乾符附貢生城南興勝屯人天性孝友富於資財戚黨之困乏者賙恤救濟惟力是視光緒甲午歲大饑斗米千錢道殣相望出藏粟以賑不給全活無算庚子秋拳匪遽起遠近騷然募里中健者厚其餼廩嚴其約束以衛鄉里糜金數千及事定後

父老醵金以償辭不受遠近嘖嘖道之晚歲尤邃於醫學凡來就  
診者不取分文往往著手成春喜占勿藥古人云上醫醫國其次  
醫人壽世之心益昭然若揭矣

韓建忠 字良佐世居城東石總大屯少業農研究種植之學頗  
有心得年無論豐歉收穫較他人為最以是中年後富甲一鄉焉  
生平儉而不吝戚鄰有貧乏不能自給者輒量力賙恤之清光緒  
乙未歲大凶里中日不舉火者數十家見而憐之遂出粟米數十  
石按口贈給鄉人感激公送齒德攸崇匾額一方以誌欽仰壽九  
十三而卒

王萬昌 字國興邑南馮屯人家道小康樂善不倦自創男女學



校各一所成績優良周監督予潔獎給熱心教育匾額十三年春  
盤山水災萬昌助款頗鉅吳延緒知事賞給濟衆為懷匾額又於  
朝陽縣蕭家店等處創設義倉以備災荒自捐倉穀數十石代募  
數百石經朝陽鎮守使龔漢治縣知事伍鈞獎以匾額文曰見義  
勇為其他若北京俄國災荒救濟會山海關設立粥鍋萬昌捐資  
募款竭力經營均蒙贈予獎章獎狀不可勝書年近古稀精神矍  
鑠蔬食布衣自奉儉約至義所當為則千金不吝數十年來樂善  
好施耗去銀幣不下五萬餘圓而指囷傾囊仍無少懈古人有言  
積金以遺子孫子孫未必能守積書以遺子孫子孫未必能讀不  
如積陰德於冥冥之中以為子孫長久之計若萬昌者亦可謂善

用其積者矣

馮庸 字天鐸海城人初以門任起家歷充顯要既乃決然舍去

在省垣創辦大冶工場招生徒實地練習以資造就繼思物質文

明日新月異非競爭學術不足與列強相抗衡乃特立馮庸大學

歲糜金錢鉅萬不支公款獨出私財於是馮庸大學之名聞天下

丁卯歲七月君由省旋里學界開歡迎會於師中學校見校址湫

隘不敷應用慨捐房宅一所以便擴充並聲明不受褒獎其熱心

公益類如此噫今所謂翩翩濁世之佳公子者上則整軍經武効

命疆場下則嘯月吟風不問世事君則功名泡幻富貴浮雲獨於

教育三致意焉此豈易於晚近求之哉

實業

農務

本城實業以農殖為大宗居民業農者約三分之二出產以高粱元豆為最多穀子棉花次之惜民智未開農學不講對於森林苗圃猶少研究農業試驗場開辦數年未著成效而廢本城農會業已成立每年按規定日期邀集城鄉會員公會議研究農務進行方法將來農業之發達可預卜矣茲將關於農業要項列左

(甲)土宜

縣治之附郭地西北近山土質多含砂石宜棉花穀子落花生東南多河土質半屬膏沃穀宜梁黍豆麥蔬宜蒜韭葱菘木宜楊柳

榆槐畜宜羊豕馬牛

縣境正東一帶偏北土質黃壤偏南土質黑墳穀宜梁菽木宜楊柳畜宜牛馬

縣境正南一帶地多平原土質肥沃穀宜梁豆木宜楊柳畜宜驃馬

縣境正西一帶地盡山嶺土質薄磽穀宜粟黍木宜梨杏桃李松柏柞榆畜宜牛羊

縣境正北一帶山嶺錯錯凹凸不平土質黃壩地宜穀棉木宜棗梨楊柳畜宜牛羊

(乙)農時

立春 舊曆正月節舊制立春前一日有司親詣東郊行迎春禮

今廢

雨水 舊曆正月中農工就傭農事初作

驚蟄 舊曆二月節地氣漸通蟄蟲始振修理耒耜施糞田疇

春分 舊曆二月中地初解凍草木萌牙園丁植蒜

清明 舊曆三月節天氣和暖百卉萌生農家種麥又為植樹節

穀雨 舊曆三月中時雨降百鳥言穀子棉花相繼播種

立夏 舊曆四月節生氣方盛五穀雜蔬及時樹藝

小滿 舊曆四月中陽氣發洩五穀初生補種小豆綠豆

芒種 舊曆五月節園丁植葱分秧農家始耘

夏至 舊曆五月中日長至王瓜生雲豆熟農家再耘

小暑 舊曆六月節溫風始至玉蜀黍熟農家三耘

大暑 舊曆六月中天氣酷熱大雨時行刈大小麥種蕎麥蘿蔔

白菜掘馬鈴薯

立秋 舊曆七月節刈黍摘瓜晒菸打靛

處暑 舊曆七月中暑氣漸退百物結實果園摘香水梨及太平

果俗稱熟貨

白露 舊曆八月節白露降種蔥與菠菜拾棉花刈早穀

秋分 舊曆八月中百穀皆熟收穫禾稼摘梨棗

寒露 舊曆九月節築場圃納禾稼園圃掘蔥

霜降 舊曆九月中霜始降草色黃樹葉紅園圃刈菘醃蔬

立冬 舊曆十月節雪始降窖藏蔬菜果品塞向墻戶農事畢

小雪 舊曆十月中水始冰地始凍積蓄糞土以備春耕

大雪 舊曆十一月節冰益堅地始坼道路平坦輸賣五穀

冬至 舊曆十一月中一陽初轉於時伐木以作薪材

小寒 舊曆十二月節買賣田廬租賃地畝

大寒 舊曆十二月中完納官糧結清出入帳目歲事畢矣

(丙)肥料

肥料即糞也係周官草人糞壤之義本境除東南部窪下地方借水餘潤無須糞力其餘無論土質厚薄一律施以肥料農家于耕

奉天省志卷五  
卷五  
耘隙即備來年之糞其法取多量之土與人畜糞摻和之或雜蒿草並入坑中經月腐爛掘出置於空場俟來年春運置地內以資養料又油籴豆餅等沉澱物養分皆厚但價值過昂惟種園蔬用之

(丁)水利

附災害

本境東南近河之處亦有引水種稻者惟夏間大雨施行西北山水暴漲滙流於此即興澤國之歎總之享其利者恒少被其災者實深也

(戊)田制

附經營之法

本境田制以縱橫五尺為一弓又曰一方步二百四十弓為一畝



每畝面積為二百四十方步從前旗地以六畝為一日又曰一繩  
民地以十畝為一日又曰一天然買賣地畝皆按畝給值而不論  
日至租賃地畝雖論日數而其租金之高下仍視畝數多寡為標  
準又土人習慣按隴計畝每隴以七百二十弓為一畝隴寬一尺  
七寸三隴即合一弓故以三乘二四而為七二其名雖殊其實則  
一隴有廣狹之不同不如二四作畝為公允近年買賣土地概用  
二四每畝賣價多至三十餘圓少至八九圓不等典價半之至田  
產經營之法約有三端一曰自種田地主或傭人耕獲二曰租種  
地主不能自種出租於人以耕獲之田賦正稅地主完納差徭雜  
費租戶擔任三曰分種地主出田佃戶出力所獲糧石柴草主佃

平分至於差徭雜費亦各擔任其半

(己)產量

高粱即蜀黍立夏前播種至秋分前後成熟每日地種子五升普通地收穫四五石秫楷一千左右束

穀子即粟穀雨前後播種白露後成熟每日地種子三升普通地收穫四五石穀草千餘斤

包米即玉蜀黍穀雨播種立秋後成熟每日地種子九升普通地收穫四五石不等

糜子即黍立夏播種處暑成熟每畝地種子五合收穫五六斗

小麥清明前後播種小暑後成熟每日地種子一斗收穫約二三

石拔去後可種秋菘

大麥其播種成熟時期與小麥無異每日地種子一斗收穫五六石晚田同上

元豆小滿播種秋分成熟每日地種子一斗五升收穫三四石小豆芒種前播種白露後成熟每日地種子八升收穫二三石綠豆大抵於隴畝空隙播種故產額較少

蕎麥大暑播種秋分成熟每日地種子斗餘收穫四五石

稗子清明播種秋分成熟每日地種子斗餘收穫八九石窪地最宜

芝麻大抵於棉花播種之故產額較少

地瓜蔓生宜砂土地至秋分成熟每日栽種子萬餘株收穫七八千斤

地豆清明下芽立秋成熟每畝約收穫六七百斤

香瓜播種於清明穀雨之間小暑成熟每日地約千餘秧一秧可得瓜三四個

西瓜播種時期與香瓜同其成熟較晚

落花生宜砂土立夏播種寒露成熟每日地種子二三十斤收穫千餘斤

線麻土人多於隴畔路旁播種每畝可得百餘斤

青麻穀雨前播種立秋收穫每畝可得百餘斤

大麻子立夏前播種秋分後成熟每日地種子一斗收穫四五石  
棉花穀雨播種處暑始採霜降收竣每日地種子百餘斤收穫子  
花約千餘斤

(庚)蔬圃

蔬圃為農家副業至專以種蔬為營業則城鎮居多而尤以縣城  
東西兩關為最常植之蔬以菘韭菠菜蘿蔔辣椒為大宗芥蒜芹  
茄王瓜雲豆山葍等次之種蔬肥料多於種穀五倍耕耘灌溉人  
工亦多每畝園地所產年約賣洋七八十圓昔年諸種菜蔬僅銷  
境內近年交通便利運銷外縣者甚夥而尤以白菜辣椒為大宗  
是以價值增高較之業農者獲利倍蓰焉

(辛)果園

果園亦農家副業以山中為最多稽其種類有梨束桃杏等而梨之產量尤多梨之名稱不一有白梨紅梨酸梨甜梨香水梨麻梨秋子梨安梨數種以外葡萄山查亦頗著名自交通便利運銷東省者每年約數百萬斤為本境輸出品之大宗也

(壬)林業

本境向無官有林近山瀕河之地民有林尚屬不少但任其自然生長於種植培護之方殊少研究以致成材者鮮楊柳除造棺槨外楊則多供建築柳則多製農具油松為建築棟樑之用榆柞為造車必需之材每年冬季附山居民採伐薪材為數甚鉅以供炊

鑿之用可占全境燃料十分之三近年森林設為專科邑內畢業  
森林學校者頗不乏人將來本境林業或有發展之一日也

(癸)牧畜

本境家畜牛馬騾驢為最多羊豕次之富室耕田駕車俱用騾馬  
中產以下之家間有牛驢諸畜之中惟牛羊滋乳蕃息利益最大  
養豕之利次於牛羊且牛羊豕均可積糞肥田故農家并畜之此  
外家畜則有貓犬禽則有雞鴨亦農家常畜之物也

農會

本城農會早未成立民國八年由縣署發起在大神廟內籌設農  
會為全境農務總機關以研究農業改良進行事宜票選蕭露恩

奉天省志卷之五  
為正會長陳祖培為副會長會員百餘人每人年納會費二元作為該會常年經費民國十年改選劉錫祿為正會長龍作源為副會長民國十二年改選宋景和為正會長副會長仍舊會所遷移文昌宮院內設平議員四名調查員八名文牘會計各一員會員較前增添數倍十五年改選正副會長悉仍舊會所遷移商會院內四鄉設分會八處其職員人數臚列於左

第一分會設立城西燒鍋屯正會長一人副會長一人評議員二人調查員二人會員無定額

第二分會設立城北正安堡正會長一人副會長一人評議員二人調查員二人會員無定額



第三分會設立城東中安堡正會長一人副會長一人評議員二人調查員二人會員無定額

第四分會設立城東五糧甸正會長一人副會長一人評議員二人調查員二人會員無定額

第五分會設立城南溝帮子正會長一人副會長一人評議員二人調查員二人會員無定額

第六分會設立城西南閭陽驛正會長一人副會長一人評議員二人調查員二人會員無定額

第七分會設立城西南常興店正會長一人副會長一人評議員二人調查員二人會員無定額

第八分會設立城西白家屯正會長一人副會長一人評議員二人調查員二人會員無定額

### 工務

本境工業以豆油為大宗燒酒次之此外製造品雖有多種除湯粉茗帚而外無甚稱奇者故土貨之銷路不甚暢旺而外貨之輸入日見增多若不設法改良以求進步何以競爭物質文明之勝乎茲將各種製造品臚列於左

### (甲)植物製造

豆油用碾壓為薄餅用籠蒸之以資滋潤裹以油草圈以鐵箍疊數片置榨中加楔以錘擊之其汁流入池中為油每日約用豆六

石出餅四十餘片油一百八十餘斤此係舊法製至於使用機器本境尚未施行

豆餅即油之糟粕有大小兩種大餅運銷營口小餅專售本境燒酒即高糧酒磨梁為屑每班四石加麴一百二十塊藏窖內經月釀成輪流更換取出以鍋蒸之蒸氣水流為酒每日兩班約出酒六百提半銷本境半銷外城麴之原料為大麥小豆每年夏秋之間僱工製造以備應用

黃酒煮黃米為粥加麴置甕中醞釀數日合水漉之俗呼黃酒可作藥引之用宴飲賓客亦有用之者

小綠豆粉以水漬豆磨成汁用粗布漉出其渣滓澄之取其沉澱

之粉調使稠粘貯於有孔瓢中用手拍之粉面下漏成條落滾水中熟則用箸挑出納冷水中以手挽出搭桿曬之便成乾粉條有粗細之分極細者為湯粉價值較昂

家機布 婦女紡棉為線僱用人工用機織成每疋重三斤上下惟農家自己用之商家普通銷售者純用洋線織成每疋重二斤左右亦有重十餘兩者俗名對子布間有運銷外縣者

香 碾榆皮或榆葉為屑和姜黃檀香料調以適宜之水分製造成條置香羅內晒乾封以紙每樁日出八九十封

改連紙 碾碎舊繩用石灰漚之至三四日取出蒸之蒸畢淨水洗之成絨和水置鍋內煮之令沸然後置水池中以竹屨抄漉層

層疊置抄畢，揭取糊牆上，晒乾成紙，銷路甚廣。

木炭 伐椴柞等木，斷三四尺許，掘土為竈，裝置其中，以土塞其上，部旁設二門，自一門燒之，視煙色已淡，便是成熟，大候然後密封其門，三四日取出，則成炭矣。首飾樓糕點舖多用之。

(乙) 動物製造

鞣鞣 取生牛皮，伐其毛，置竈上，以毛草燃薰，令色微黃且柔，鞣工人裁縫，即成農家皆用之。且運往吉黑各省。

白皮 取生驃馬皮，去其毛，用硝灰炙熟，可製車馬應用各種皮貨。

毡 取羊毛，彈之使軟，攤成片，和水壓之，製成邊幅，晒乾始成。

毡矣毡鞋毡帽製法畧同

毡 取牛毛紡之成線染以紅紫等色用杼與刀織成仄幅普通應用之毡多以二三幅為適宜至於鋪地包裹之用則大小不等矣

(丙)礦物製造

石灰 掘地為竈置青石於其中燒半日許息火翌日取出用時以水沃之便成灰為建築必需之品僅銷本境

磚 築土為窰高四五丈范土為坯置其中燒之後五六日取出成磚每窰約萬餘塊專供建築之用

瓦 以泥作圓輪劃分四瓣即成瓦形其燒法與磚同

瓦盆 范土為泥置於木輪上足踏輪使轉以手捏之遂成盆形曬乾入窑燒之越一日取出即適於用

琉璃盆 製法與瓦盆同曬乾後塗以紅綠黃等色入窑燒之越一日取出即成銷於本境亦或運銷於他縣

石器 取本山之石製成碾磨碌碡暨石柱石桌石爐等器

金銀首飾 用爐火製造至鑲嵌雕鏤時須噓以燃火使之柔軟以便工作銀質首飾又有包金鍍金蘸黃燒藍等製法

銅器 銅有生熟之分生銅鎔化鑄器熟銅錘擊成器首飾製法與金銀無異

錫器 范錫為板隨其所用程式裁剪之然後攢合嵌之成器鉛

之製法與此畧同

鐵器 鐵有生熟二種生鐵鎔化可鑄鏵子鍋爐鐘磬等物熟鐵之錘擊可製車瓦車釘勺鋤鎌馬掌等物

(丁)相合製造

車 以木為輪以鐵為瓦以麻繩獸皮為牽挽之具

蠟 以細葦管蘸牛油麻油外以白蠟為皮有紅綠白三色紅者於吉禮用之綠者於凶禮用之白者普通用之近年洋燭輸入而本境所製之蠟遂漸少矣

炸 攤泥於紙曬乾隨所用之大小切為片用鐵棍捲而搓之使之堅實抽去其棍泥塞其一端中實以葯以繩繫其兩端錐孔加



藥線編之成炸

炮 製法與炸同惟其排稍短單個燃放

右列各種工業純用人力製造不見改良惟石印局成衣舖洋襪莊靴鞋舖等間有使用機器製造者全境工業倘由此提倡利用機器以代人力則他日工業之發達可翹足待也

### 商務

本境商務從前頗稱繁盛至黑山盤山台安相繼設治縣境面積遂漸縮小市面亦因之蕭索近年經營貨殖者日衆故商業稍見恢復今又有由溝鎮至縣城建築鐵路之議倘能見諸實施則諸種貨物運輸便利本邑商務當有一番起色矣

卷五  
五  
(甲)商會

本城商會於清光緒三十三年成立會址在十字街西財神廟院內為全境商務總機關設總理一人協理二人會員二十五人選舉張秉彝為總理蕭毓瀛張瑞恒協理民國元年改選彭裕孚為總理汪寶琪王國英為協理三年奉令改總理為正會長協理為副會長是年改選趙文林為正會長汪寶琪為副會長設會董三十二人以襄辦會務七年改選汪寶琪為正會長王國英為副會長十一年改選彭裕孚為正會長副會長仍舊十三年改選正副會長悉仍舊十四年改選韓慶棠為副會長正會長仍舊十五年改選汪寶琪為正會長萬融和為副會長又於閭陽驛溝幫子青

堆子中安堡設商務分所四處各設理事長一人理事一人以辦理該鎮商務事宜

(乙)儲蓄會

本城向無金融機關於民國七年奉天儲蓄會在城內設立分會一處派經理一人專司會務以接濟地方金融提倡人民儲蓄為宗旨

(丙)幣制

縣境商民從前交易以現銀為主弊以銅錢為輔幣銅錢以一百六十文為一吊清光緒甲午年國家改鑄銀圓輔以銅幣銀圓分一圓五角二角一角半角五種每元作銅錢六吊銅幣分當十當

二十兩種以當十銅幣十枚抵銀圓一角民國成立紙幣盛行銀圓日見減少本境通行紙幣為奉天官銀號奉天中交兩分行之銀票及奉天公濟平市錢號之銅枚票近來奉省發行大洋紙幣以小洋十二角為一圓滙兌各省商民稱便

(丁) 度制

縣境商家沿用之尺以蘇尺為標準買賣布疋用之至土木工程用營造尺

(戊) 量制

縣境各處量制不一城內每斗為二十五解半四鄉集鎮比城斗均漲一升有奇

(己) 衡制

縣境商民沿用之秤係以制錢一百四十文為一斤與各城無甚  
差異市秤較庫秤每兩小四分



全境輸出輸入表

輸出品額	輸出品數	輸出品額	輸出品數	大豆	紅糧	二〇〇〇石	數
大豆	五〇〇〇石	紅糧	二〇〇〇石	小豆	豆餅	五五〇〇石	數
黃米	一五〇石	豆油		棉花	燒酒	二五〇〇斤	數
果品	三〇〇〇〇〇斤	獸皮	值	花生	豬鬃馬尾	七〇〇〇〇斤	值
落花生	七〇〇〇〇斤	豬鬃馬尾	二〇〇〇〇元	花生	豬鬃馬尾	七〇〇〇〇斤	值

明說

紅洋機	花色布	套布	標布	市布	坎布	打連布	花旗布	尺布	輸入品額
九五〇	二五〇〇	一〇〇	五六〇 <small>足</small>	一二〇〇	八五〇	三五	八〇二〇	九五〇 <small>件</small>	數
西素緞	線縐	洋縐	串紬	線春	花絲葛	魚鱗緞	國華緞	花褲緞	輸入品額
三〇	五〇	六〇	九五	一一〇	一六〇	八五	九〇	一〇 <small>連</small>	數



洋素 卜	素 卜 紬	線 緞	秦 西 緞	羽 細	板 綾	夏 布	官 紗	光 華 紗	青 貢 緞
一三〇	一五〇	一八〇	二五〇	七〇	二〇	一二〇	二〇	三〇	三〇
線 麻	色 軸 線	色 卡 線	白 洋 線	白 格 線	洋 紗	法 蘭 絨	打 連 絨	口 絨	東 洋 緞
四〇〇〇〇斤	五〇〇	一五〇 <small>羅</small>	四〇〇〇	五〇〇 <small>捆</small>	一八〇	二〇〇	七〇〇	六〇	五〇

平  
呢

一〇〇〇

江  
北  
花

四〇〇〇〇

線  
呢

五〇〇

佛  
表  
紙

一〇〇〇〇篋

嗶  
嘰  
呢

四〇

京  
海  
紙

一三〇〇〇塊

川  
連  
紙

三二〇篋

茶  
葉

四〇箱

白  
官  
紙

一五〇扣

紅  
糖

一四〇包

毛  
邊  
紙

三〇〇篋

白  
糖

一五〇〇

洋  
粉  
連  
紙

四八〇足

冰  
糖

一〇〇

高  
麗  
紙

四〇捆

元  
蘑

五〇〇斤

瓦  
甲  
紙

三〇〇篋

木  
耳

九〇〇〇

表  
辛  
紙

五〇〇扛

海  
參

三〇〇

蟹 肉	葛 仙 米	江 瑶 柱	魚 肚	魚 骨	青 絲 烟	黃 菸	紹 酒	金 箔	窩 紙
三〇〇	二〇〇	二〇〇	七〇	六〇	九〇〇 <small>箱</small>	二〇〇〇 <small>斤</small>	二〇〇 <small>罇</small>	五〇〇 <small>箱</small>	四〇〇〇 <small>足</small>
藍 花 皂	洋 燭	洋 釘	洋 火 柴	廣 大 料	魚 翅	海 帶 菜	針 金 菜	洋 粉	海 米
七〇〇	三〇〇	五〇〇	八〇〇〇 <small>箱</small>	七〇〇	五〇	五〇〇〇	五〇〇	一〇〇	七〇〇

猪牛筋

五〇〇

雨旱伞

一五〇柄

青笋

六〇算

洋毯

三〇〇條

玉藍片

三〇〇斤

洋面

一〇〇〇〇〇袋

面鹼

六〇〇〇

紙烟

一五〇〇箱

洋鹼

四〇〇〇

土鹼

二〇〇〇塊

花生

一〇〇〇〇

靛油

七〇〇筒

古月

八〇〇

鉛粉

四〇〇箱

顏料

四〇〇元

皮鞋

五〇〇双

圖書

三〇〇元

皮靴

三〇〇双

毛筆

五〇〇封

化妝品

二五〇元

鉛

筆

四〇〇〇  
羅

石

筆

二〇〇〇  
盒

香

墨

二〇〇〇  
斤

瓷

器

值  
三〇〇〇  
元

鐘

表

一〇〇〇  
件

玻

璃

二〇〇  
箱

草

帽

一〇〇〇  
打

衛

鞋

一〇〇〇  
雙

粒

鹽

二〇〇〇〇〇  
斤

牛

皮

四〇〇〇  
張

皮

酒

一〇〇〇  
瓶

牛

乳

一〇〇〇〇  
盒

餅

乾

五〇〇〇

風

梨

一五〇〇〇

橘

子

一〇〇〇  
箱

甘

蔗

八〇〇〇  
擔

藥

材

值  
一五〇〇〇  
元

木

材

值  
〇〇〇〇〇

木

炭

一〇〇〇〇〇〇  
斤

香

皂

六〇〇〇〇〇  
盒

商業工業一覽表

雜貨商	絲房	當舖	錢莊	名稱	戶數	錫	銅	銀	金
書局	鐘表鋪	瓷器鋪	洋貨莊	名稱	戶數	煤油	煤炸	鐵	鉛
七二	三	七	一	戶數	二五〇〇	二五〇〇斤	二〇〇〇〇	八〇〇兩	
五	五	一八	一〇	戶數	二〇〇〇〇箱	五〇〇〇〇噸	七〇〇〇〇〇斤	五〇〇斤	

糧米店

五〇

紙烟代理店

一

草料店

三

大小車店

一五

糧棧

三五

藥局

一二

鹽店

四

菸舖

一六

煤油代理店

一

儲蓄會

一

以上屬於商業者二百五十五號

燒鍋

五

油房

一二

香舖

五

紙局

七

染房

二〇

靴鞞舖

六

白皮舖

六

木舖

一八

鐵匠爐	估衣鋪	氈鞋鋪	首飾樓	錫匠鋪	筆鋪	帶子鋪	羅圈鋪	炮鋪	篋鋪
一六	六	三	八	二	四	四	三	三	一
鐸爐	成衣局	鞋鋪	銅匠鋪	鏡子鋪	石印局	口袋房	蠟鋪	缸席鋪	繩麻鋪
四	一四	二五	四	三	五	二	二	一〇	一四



鞭桿鋪	靛瓦窰	牙醫館	理髮店	鼓樂房	燒餅鋪	豆腐房	鮮果局	糕點鋪	機匠房
二	三	二	一八	五	二〇	五〇	五	一二	三〇
鑲牙館	鞍鞞鋪	石匠房	照像館	澡塘	棚鋪	飯館	醬園	香油房	畫匠鋪
二	二	一	二	二	五	九	二	七	一〇

以上屬於工業者四百零三號

## 礦務

本境西北兩部山嶺雖多而礦務向不發達除碾磨石石灰石火  
硝而外別無礦業之可言近日研究礦學者日衆倘隨時考察或  
有他項礦產之發見則地利可闢而寶藏可興矣

火硝於斥滷之地取土置釜中熬之遂成火硝送交硝磺局由局  
給價本境炸炮鋪悉由局購買以備應用

石灰石城東北十五里石灰窰子村所產礦石色白稍青可製石  
灰土人造窰數座專燒石灰境內建築者多用之近年外縣石灰  
輸入甚多此項石灰因銷路不暢遂停止製造

碾磨石 城西北三道溝所產白青石其質堅可製碾磨本境米

店所用碾磨皆取給於此又可作條石礎石運銷各處用途甚廣

物產

夏禹區九州之物產以定則賦管仲治齊以五施別五土蓋地不  
愛寶窮物宜以利器用而阜民財者為經國之大政焉北鎮山嶺  
綿延土地曠衍園林蔬果九穀六畜之屬天然之產額頗豐書曰  
不貴異物賤用物民乃足因所利而利之則飛潛動植皆斯民樂  
業安生之資也志物產第五



植物

穀類

稷 禮記謂之明粢按本草綱目稷即稯楚人謂之稷關中謂之糜晚種早熟苗穗似蘆其米為黃米

黍 稷之黏者為黍高三尺有紅白二種土宜高燥今呼大黃米可釀酒米粉充貢

蜀黍 種始自蜀今呼高糧為土人常食之品高七八尺其葉甚長脈皆平行漚為米粉可製餅餌又和麩可以釀酒

黏蜀黍 一種殼黃一種殼黑與蜀黍無異但性黏耳又一種若帚黍性亦黏穗長可為帚

粳 陸稻也米似大米而滑潤次之本境產額甚少

黏稻 即糯米可煮粥亦可包以葦葉形同角黍俗呼粽子

粟 即穀子米曰小米有黃白二種黃者即古之黃粱其禾桿曰穀草可以飼牛馬

秫 粟之黏者爾雅謂之象有赤黑等色今呼小黃米北人用之釀酒其莖桿與粟同

小麥 詩謂之來其實可磨麩以供食用其麩皮可飼馬其桿可製草帽

大麥 詩謂之牟形似小麥可作飯釀酒熬糖麩皮及麥桿用途與小麥同



蕎麥 莖弱而翹伏種秋收磨麩可食北地人常用之

稗 宜下濕地草似穀而實甚小葉純似稻節間無毛米最甘滑  
玉蜀黍 莖葉似蜀黍籽藏苞中俗呼包兒米又呼玉米可粒食  
亦可磨麩

棉 色白如絮軋去其子彈使鬆輓紡之為紗織之為布其子可  
榨油其渣可為肥料

蘇 爾雅謂之桂荏本草曰紫蘇有紫白二種收子榨油通行各  
省

脂麻 其種來自大宛曰胡麻其實曰脂麻俗呼芝麻可製香油  
人所共食

菴麻 子斑紅如牛蟲者可入藥黯花者俗呼大麻子二種俱可

榨油

大麻 雌雄異株雄曰臬可榨油雌曰苴子曰麋皮漚之為麻曰

線麻

大豆 古謂之菽今分黑白青黃諸色皆可榨油其渣為豆餅可

充肥料以運銷各國

小豆 有蠶白赤黃黑數種赤者入藥可造條粉

綠豆 粒粗而深綠者為上粒潤而淡者次之可造湯粉及糕點

夏季煮湯飲之能清暑解毒

豌豆 爾雅謂之戎菽遠志謂之回鶻豆花豔紅形如蛺蝶雄蕊

十雌蕊六有大小二種其實可食而莖葉可供肥料

扁豆 色不一白者入藥

雲豆 種來雲南而味更勝俗呼六月鮮可充蔬品

蔬類

韭 禮記名豐本性溫葉青翠可以分根可以子種春初味最美可供祭祀亦為蔬

蔥 於白露種之來春滋長謂之小蔥夏季移池謂之倒畦蔥秋末不掘來春再發謂之羊角蔥為和味必需之品四時皆用之

薤 本草一名火蔥又有山薤爾雅謂之勤

蒜 分大小二種大蒜張騫由西域携來其皮紫色小蒜中國本

有其皮白色和味用之且可解毒

小蒜 生田原間俗呼小根菜

菘 俗呼白菜有二種肥厚嫩黃者為黃芽白窄勁者為箭桿白  
性耐寒霜降刈獲

芥 有數種俗以大芥為芽芥以馬芥為癡芥白芥子可入葯

芹 越年草也葉面有光澤莖高一二尺有水旱兩種赤白二色  
紫莖 味酸花白不結子俗呼野芹菜

菠薐菜 唐太宗時尼波羅國所獻今呼菠薐菜其莖脆其葉綠四  
時皆有之

蔓菁 爾雅謂芥頭即蔓菁詩謂之葍一名蕪菁

萵苣 正二月下種有青赤二色俗呼生菜生食味如胡瓜謂之

萵筍

萵臺 俗呼臭菜為生食之品子可軋油

馬齒莧 本草一名五行菜以其葉青莖赤花黃根白子黑也

蘆荖 種傳西域俗呼香菜

茴香 本草作懷香又云内生蟲可治疝

蘿蔔 爾雅曰茭蘆菹今以圓而皮紅者為大蘿蔔長而皮白紫者為水蘿蔔亦有青色者子可入藥名萊菔子

胡蘿蔔 有黃赤二種元時來自胡地故名

山藥 本名薯蕷亦可入藥

越瓜 種始自越一名稍瓜短者為菜瓜脆者為脆瓜

黃瓜 月令謂之王瓜其種來自西域可充常蔬

萵瓜 種出東洋今為常蔬玉瓜與此類同

攪瓜 形類萵瓜而小内生筋絲醬醃蜜餞皆宜食時以筋攪出

之似縷切者

絲瓜 瓜時以石墜之則直老則筋如亂絲可入葯主治利水却

濕

冬瓜 本草一名白瓜

壺蘆 即瓠瓜又稱匏瓜今以長者名瓠子圓者名葫蘆皆可食

又有腰者為葯葫蘆小而扁者為油葫蘆老而堅皆可備器用

茄 有海茄水茄旱茄之別色亦各異

黃花菜 一名針金菜即萱草花也

酸漿菜 似羊蹄而葉細酢可食爾雅謂之殭

榆蘑 榆樹朽根所化

榆肉 生樹窟中色黃善固腎氣食品所珍

榛蘑 生榛棵下高脚紅裏

同蒿 形氣同於蒿亦可茹

萹蒿 爾雅作藜詩於以采藜是也今呼萹蒿菜內務府采以入

貢

蕨 生於山野莖色青紫初生時即可采取其葉之嫩者飢年亦

可救荒

苦蕒 即詩之荼與芑也月令四月苦菜秀即此葉似苦苣而細斷之有白汁俗呼苗馬菜

芋 蘇恭唐本草有青芋紫芋真芋白芋連禪芋野芋六種以其魁如鴟之蹲故亦名蹲鴟為園中常蔬內含滋養料甚多

灰藿 俗名灰條菜

地膚 爾雅謂之王慧今呼掃帚苗嫩可茹老時可為帚子入藥名膚子

紅花菜 即山丹花花大而斑者曰捲丹花根為百合

薺 開細白花結莢如小萍而有三角初生可茹其甘如薺即此



秦椒 俗名辣椒生青熟紅土人多食之且運銷外縣

紅薯 俗呼地瓜一名甘藷

馬鈴薯 俗呼土豆其狀如馬鈴故名

東瓜 形似瓠子而稍粗短

草類

烟草 冬可禦寒土人尤多用之俗謂之菸

葦 大葦也今有稅

紅根草 葉瘦而長柔韌可為繩

莠草 秀而不實其穗作黃白色形如狗尾故俗狗尾草原野垣  
墻多生之苗葉似粟而小頗可亂苗

奉天省土金錄言  
水稗草 形似稗苗小而柔

星星草 似水稗草

扁擔草 以上四草俱生田原間可飼牛馬

章茅 可苫屋

羊草 可飼牛馬

黃背草 層層有節可代章茅

黃草 可染黃色

燕麥 粒如麥而小爾雅謂之雀麥

白草 可織帽

莎草 南山有臺即此莖宜製蓑笠根可入葯即香附子

馬蘭 似蒲而小花藍無香可染色根可為刷月令荔挺出即此  
子入藥名蟲寶

老少年 一名秋紅一名雁來紅春夏葉色青黃至秋漸紅如花  
土人謂之老來變一名十樣錦

香蒲 菡如荀可食茸入藥名蒲黃

蘋 四葉相合中折十字浮生水面詩於以採蘋即此生陸地者  
則青蘋也

藻 葉大者曰馬藻葉細者曰水蘊詩云采藻重其潔也土人呼  
水蘊為雜草冬取食之名凍青菜

水葱 生水中如葱而長又名翠管可為席今但織團扇曰蒲扇

萍 浮生水面或云楊花所化紫背者入藥

如意草 一名箭頭草開紫花莖實下垂似如意可療血風瘡

芄蘭 蔓生葉綠而厚斷之有白汁子長數寸俗名雀瓢

葛藤 蔓延山谷長至數丈南人以船載去治為絺綌土人但取

束物

刈萱 即荼似葦而小葉背有白紋夏初開黃花其穗如拂

藥類

烏頭 宿根草也至秋則莖高二尺餘開花作兜狀其色或白或深碧或濃紫塊根而簇生殖於庭院其花可賞其根入藥有毒非危病不可用而以根之正者名烏頭兩歧者名烏喙細長三四寸

者名天雄根旁如芋散生名附子旁連生者名側子

木本鉤吻 落葉之灌木也以入口而鉤人喉吻故名生原野或河濱葉形畧似南燭而對生其花穗狀結圓實紅色美艷鳥獸食之皆死

茨草 一名蒺藜謂其刺傷人甚疾而利也蔓生道旁及牆上細葉布地子有三角如菱而小

亞麻 一作鷓麻莖長三四尺夏初開淡色花刈其皮可織紗造紙榨其實可取油又可食可入藥

石葦 以生石上葉長近尺闊寸許柔韌如皮故名又名金星草可入藥

春天省北金鼎言 卷五  
捲柏 一名豹足象形也又名長生不死草萬歲草言其耐久也  
可入藥

蒲公英 其花瓣作舌狀集於一總梗之巔其總梗中空含有白  
汁如乳可入藥

三七 一名山滕春生苗夏高三四尺葉似菊而勁厚有歧尖莖  
有赤稜秋開花花乾則吐絮治金瘡折傷出血及上下血甚效

蒼朮 一名山薊苗高二三尺其葉抱莖而生有小刺根似老薑  
蒼黑色肉白有油乾之可驅蚊東三省惟出廣甯者佳

艾 爾雅謂之水臺

地丁 有紫花黃花二種

車前 詩名芣苢好生道旁布葉如輪俗呼車輪菜抽穗結子即  
車前子

兔絲子 爾雅謂之唐蒙今多生豆田中農家往往以之飼豕俗  
謂黃藤子

桔梗 一名薺花又名白藥夏開小花紫碧色頗似牽牛即杏葉  
菜根曰桔梗其名葉菜根曰甜桔梗

五加皮 五葉交加故名宜漬酒

貝母 花白葉似韭詩言採其苕即此

牛旁子 根大者如臂長近尺其色灰黦三月生苗四月開花結  
實如球狀一名旁翁菜一名惡實一名鼠黏子

遠志 苗名小草即詩之萋

地榆 葉似榆而長花可染色

黃芩 本草謂之芩者黔也黔乃黃黑之色也根如釵股葉如竹

柴胡 質硬者竹葉柴胡質柔者韭菜柴胡

苦參 即野槐根

牽牛 有黑白二種土人呼黑丑白丑

老鸛嘴 蔓生枝間結角形如鸛嘴入葯治風亦可染色

地骨皮 即枸杞根本草謂仙杖夏名枸杞秋名卻老枝冬名地

骨皮

地膚子 即掃帚根



菜蓴子 即蘿蔔子

蓖麻子 俗呼大麻子

沙葎 即杏葉菜根

益母草 詩謂之葎爾雅名荒蔚

金銀花 花分黃白二色

芍藥 即芍藥根分赤白二種

百合 根如蒜頭有瓣俗名捲蓮花入葯亦可食

桃仁 即桃之種子

杏仁 即杏之種子

青蒿 俗呼萬年蒿

薤白 即小根菜根

土大黃 即羊蹄葉根

木類

松 有赤黑二種赤松一名雌松黑松一名雄松赤松之皮作紅  
橙色黑松則帶黑色赤松之葉柔輒黑松則堅勁土人以結子者  
為菓松無子者為杉松脂多者為油松本境所產油松最多

刺兜松 其松多刺

柏 陰木也木皆屬陽而柏向陰莖直而高經冬不凋柏葉拍仁  
入葯

桑 按後燕錄云遼川無桑慕容廆通於晉求種江南始得之其

葉之緣齟齬如鋸齒涵有養料飼蠶最宜又韌皮甚厚亦可造紙  
糜 山桑也中為弓材及車轆葉亦可飼蠶

榆 本地榆類最多皆美材刺榆花榆尤佳刺榆大者中為車軸  
一名軸榆唐風所謂山有樞者是也花榆裏細宜為几案凡榆臃  
腫處花紋尤勝可飾器用人多珍之

槐 爾雅疏葉大而黑者名櫟槐晝合夜開者名守宮槐細而青  
綠者但謂之槐今山中皆有之花入葯未開者名槐子可染色

杜 一名甘棠移植梨樹結實甚佳

小刺榆 葉初生鮮可茹長僅文餘質細而堅緻打作槍桿用之  
青楊 葉大而圓木可造船採為箭筈

白楊 如青楊葉微小皮白木宜箭筈一種生水澤者多合抱剝  
為槽盆性不燥裂

柳 質粗性喜濕浸水中不易朽土人多用為杯捲棺槨之屬

檉 河柳也多生河畔莖赤葉細柔弱異常可製筐篚之用

花拒柳 質堅緻可為鎗竿蠟虫食之一名蠟條

樺 皮似山桃有花紋紫黑色可作弓背又可作箭筈木包紋極  
細作椀亦佳

椒 葉大皮黑紋細微赤者曰紫椒質白者曰糠椒椒皮可製繩  
引火鎗軍中用之

椿 葉香可噉者為香椿

楸 類核桃樹其木可為槍桿及船槳皮堅韌亦可求物

樗 似椿而葉臭土人呼為臭椿

柎 爾雅謂之攄葉似杏皮理糾結質最堅勁俗呼紐筋子木

栲 似樗而葉稍狹爾雅謂之山樗

柞 堅韌之木新葉將生故葉乃落高大堅實中為車材皮黃可

染色木心黃朽者可為大絨

櫟 亦柞類一名栲質堅土人多以燒炭

青剛柳 亦柞類材中為弓

棟 赤者葉細中為車輞白者葉圓木理堅緻其包亦可為木椀

刀柄之用

煖木 或云即黃蘗木皮煖可墊燈心包弓把細者中為鞭桿  
荆條 一云牡荆成叢疏爽故又名楚一種葉圓花紫枝柔細可  
為筐筥一種粗勁者名鐵荆條根可為髑頭

漆樹 皮白葉似椿花似槐木心黃深山有之但無採之者

皂莢樹 刺長皮潤結角如豬牙者入葯長而肥厚者多脂長而  
瘦薄者枯燥子黑

山藤 木之類枝柔韌中為鞭桿

六稜木 枝幹皆六稜

明開夜合木 一名金銀柳結子如花至冬不凋木理細潤

老鸛眼 一名鼠李木堅緻有花紋子赤黑如鴉眼皮可染色

黃楊 木堅難長惟山中有之

棘 一名檣有赤白二種結子者名酸棗仁入藥不結子者為牛棘俗棗刺科

花類

長春花 柔條紛披黃花爛熳逐時開放

迎春花 形似長春開黃花立春前後即開

探春花 春過始開

杏花 春夏之交開如錦繡

桃花 色粉紅開於春季又有碧桃一種花開燦爛色亦如之

梨花 醫巫閭山最盛色白開時望之如香雪海

李花 色白與梨花相似

丁香花 紫白二色生於野者名野丁香氣馥郁勝於羣花

小桃紅 花色紅於碧桃

地檀花 杏黃色大於粉圍花

海棠花 一名垂絲海棠一名貼根海棠又有秋海棠近年又多

洋海棠四時常開色甚嬌豔

牡丹花 有紅黃白紫數種花最豔美俗呼為富貴花

山丹花 紅花六瓣一名紅百合其跗未開者乾之即紅花菜

金銀花 有黃白二色故名蒂必成雙蔓生一名忍冬

芍藥花 有紅白紫諸色五月開花生山野者曰山芍藥芍藥殿



春又名婪尾春

薔薇花 有紅白二種花開時味甚香

玫瑰花 紅者可入食品黃者花微小俗呼刺梅野開者花皆單

瓣色紅子赤名曰山刺梅

石榴花 張騫使西域携來有紅白黃三種不結果者名翻花石

榴

捲丹花 花色紅其根如百合

鳳仙花 俗呼漬指草性能透骨子入藥

木槿花 朝開幕捲即詩之舜華一名夜合

蜀葵花 花色不一俗呼蜀菊花紫者可染色紅白者可治帶疾

一種莖短花小而單者錦葵也俗呼小蜀菊

向日蓮 獨莖頂作黃花大如碗向日而轉亦名葵花

荷花 詩謂之菡萏爾雅謂之芙蕖今名蓮花有紅白二色生泥水中開於盛夏亦曰蓮花

雞冠花 形如雞冠有黃紅白數種

醉八仙 紫色如丁香

六月菊 爾雅謂之盜庚色深黃入藥名旋覆花

護草花 護草色一名鹿葱喜生陰地花六出四垂乾則為金針  
菜相傳食之可以忘憂故詩云焉得護草言樹之背

山胭脂 花有紅黃紫白諸色又名粉團花俗呼茉莉花

馬櫻花 花如絨一名合歡其葉晝舒夜捲

玉簪花 一名白鶴仙未開時如白玉搔頭黃紫者差小亦名玉

簪

石竹花 枝如竹花色不一子入葯名薶麥

紅藍花 即紅花以葉似藍故有藍名張騫得於西域可充葯品

亦作染料

金錢花 回瓣色紅紫而圓落必以夜

牽牛花 蔓生花色不一俗呼喇叭花有紅藍白三色子入葯

曼陀羅 花如牽牛花而大引蔓甚長俗呼爬山虎

柳桃 花似桃花葉如柳葉春夏秋三季皆開之

剪秋羅 有紅黃諸色四圍參差如剪

秋葵花 色正黃開亦向日與向日蓮各為一種

荷包花 亦海棠類也花形似荷包鬚亦如穗

百日紅 木本花如丁香

千日紅 草本久而不萎

蘭草花 葉如韭種類不一野生最少多植盆中香味異常

江西臘 花似菊花有紅黃白紫數色枝頗捩曳

水紅花 宿根也高者丈餘多生下濕地詩隰有游龍即此今人

園中往往植之

繡毬花 叢生如毬

菊花 禮季秋之月菊有黃華近時其種甚繁色亦各異經霜不落傲骨天成文人多愛之

果類

松子 按本草松子出遼東及雲南今吉林最多此地甚少

榛子 香美甲於他省經荒火燒落者尤佳

胡榛子 結子如椿殼大實小其木柔長

山楂 爾雅謂之机繫土人呼為山楂者為山梨紅鬚巫閭山最多蜜濺曰温脯其味極佳

梨 渤海傳果有樂遊之梨梨之種類甚夥最著名者為紅梨鴨梨白梨安梨麻梨秋子梨香水梨等或鮮或凍或蜜濺酸甘適口

運銷東省為本境輸出品之大宗

檳子 實紅色形似蘋果而稍小味甚香俗名聞香果

桃 桃之接於柳樹者曰柳桃實大無味佳者為白桃其味濃厚人多嗜之

朱櫻 禮云含桃爾雅楔荆桃今名櫻桃其紅白相間者名玉櫻

李 渤海傳果有九都之李本境所產無幾為果品中最貴者

杏 甘者為杏酸者為梅成熟最早於夏至後運銷東省俗呼熟貨

棠梨 即杜梨味甘酸不一有紅白二種

葡萄 圓產者大而味佳有紫碧圓長之別山產者實小味酸有

黑白二種可釀酒飲之其味最美

棗 園產者味甘而脆山產者稍遜又有軟棗一名丁香柿其形如柿實小而長蜜濺最宜

拘奈子 形如麥味酸色紅採取供祀

菱 一名菱色有紫黑形有兩角三角四角之分熟之亦可食之

芡 俗呼雞頭入藥名芡實

郁李 爾雅謂之唐棣結實如櫻桃可食仁入藥

蘋果 花粉紅色果紅碧相間味甚甘美

沙果 初青色熟紅色似蘋而小產於山者最多

核桃 一名胡桃其仁可食山核桃兩端有尖家核桃形圓如球

無花果 其葉似桐不花而實至秋而熟

石榴 漢張騫使西域得塗林安石榴以歸又名海榴其熟時皮色甚紅內多子可入食品

瓜萹 宿根也開花黃白色即詩之果臝根即天花粉

歐李 實如小李酸澁

桑椹 色黑紫味甘酸一名桑仁

動物

禽類

雞 易及禮記俱稱翰音按遠有食雞角雞二種食雞可充庖厨角雞即鬪雞也又毛之反生者曰番毛雞白毛烏骨者曰烏骨雞



雄冠尾長羽毛甚美能司晨天曉則鳴雌雞尾短小能生卵且能  
孵雛農家皆畜之

雉 尚書謂之華蟲禮記謂之疏趾月令孟冬雉入大水為蜃今  
呼野雉生於山野間肉亦可食且羽毛華美製作捍子可以拂塵  
鷩 似鴨而大羽毛潔白長脰善鳴

鵠 俗名天鵝大於雁羽毛皆白其毛可為服飾

鴨 家禽也頸長嘴扁足有蹼善游泳水中周禮庶人執鶩即此  
野鴨 即鳧也爾雅鶩沈鳧以性好沒故名近水泊中時有之足  
有蹼善游泳與鴨同

鴻雁 禹貢謂之陽鳥詩疏云大曰鴻小曰雁月令孟春之月鴻

雁來春時來自南秋復南翔

鷓 一名鷓鴣屬也月令季春田鼠化為鴽夏小正鴽亦化為鼠  
本草以無斑者為鷓與鷓為二物今呼為黃鷓

鶉 大如雞雛頭小而尾短性善鬪俗呼鷓鶉

練鵲 似鵲而小黑褐色頂上披一帶一名帶鳥長尾白羽今呼

拖尾練

黃鸝 即倉庚也一名黃鳥又名黃鸝其色黧黑而黃喜食桑葚

慈烏 色黑能反哺者俗呼老鴉

鴉 即詩之鴛爾雅謂之鴨鴉似慈烏而大不反哺背腹白土人  
呼為山老鴉

鵲 即喜鵲也大如鴉長尾尖嘴腹白瓜黑營巢樹間開戶必背  
太歲如歲月多風則巢下枝故又名靈鵲

鴛鴦 形如鴨色黃有紋紅頭翠鬣止則相偶飛則成雙

鷺鷥 詩詠振鷺即此林棲水食潔白如雪者曰白鷺又有紫鷺  
碧鷺種類大小不一

鷹 即鷂鳩也禮月令季夏之月鷹乃學習孟秋之月鷹乃祭鳥  
種類不一出遠海者為上白鷹尤為摯猛

鷄 即鷄易曰隼詩曰晨風本草釋名云鷹小為鷄其性甚猛善  
於搏雞俗呼鷄鷹

魚鷹 大如鴉有黑白二色鈎嘴食魚一名鈎魚郎

燕 古曰玄鳥禮月令仲春之月玄鳥來仲秋之月玄鳥歸營巢  
梁間俗以為善營巢者為巧燕不善營巢者為拙燕

鴿 依人鳥也性喜合來去不定孳息甚繁其卵亦可佐饈

雀 依人小鳥俗呼家雀棲止於檐瓦間朝夕齊鳴其音聒耳

戴勝 似山雀尾短嘴長青色頂上有毛角如戴花月令季春戴  
勝降於桑即此

鳩 似山雀毛色不一性拙不能為巢詩云鵲有巢惟鳩居之俗  
呼斑鳩

蝙蝠 爾雅謂之伏翼晝伏夜出飛翔如鳥形體似獸糞可入藥  
即月明砂

鴈鳩 禮記仲春之月鷹化為鳩仲秋之月鳩化為鷹指此形大如斑鳩長尾一名布穀

鷦鷯 詩謂之桃蟲似黃雀而小青斑長尾喙利如錐取葦花為巢最工緻爾雅云鷦鷯剖葦俗呼為巧女

啄木 爾雅曰鴽喙如錐善啄木凡鳥舌皆根於喉而藏於味惟鴽舌根通腦後舌尖引之逾長樹中蠹蟲能鉤取食之

百靈 羽毛蒼白色有斑以其善鳴人多畜之

縮脖子鳥 灰色形如鸛翅大脚高飛則縮頸俗呼縮脖子

銅嘴 似雀而大色黑灰喙青黃如銅

錫嘴 嘴似錫故名

鐵嘴 形類窩藍無角頂

蠟嘴 即桑扈之屬啄如黃蠟故名土人多畜之以為翫好之物

紅料 色紅善鳴色花者謂之花料又謂之藤料

白眼雀 似小黃雀目有白圈

靛雀 大似瓦雀靛色

黃肚雀 俗呼黃肚囊

白頭翁 形似鵲鴿頭白身灰色

拙老婆 領下色紅

畫眉 似鶯而小黃黑色其眉如畫善鳴

三道眉 似家雀其眉分三道

山和尚 類山喜鵲尾小而短灰黑色

鴟鵂 身大色黃黑而斑畫則目無見夜則明一名夜貓子又名貓頭惡聲之鳥也

鳳頭鳥 一名阿藍韋昭謂之鵯扈有毛冠者曰鳳頭呂覽注鵯一名冠雀是也小者曰清水又呼叫天爾雅謂之鶻鶻尾短多聲千里紅 頂有紅毛喜食蘇子俗呼蘇雀雪後即來羣飛入海

鐵背雀 大於家雀灰色尾分兩白翎

獸類

牛 禮記祭宗廟之禮一元大武今以純黑者供祀為反芻獸能耕田駕車其糞可作肥料農家多畜之

馬 頸有長毛名曰鬣足趾一蹄善走可以代步亦可耕田駕車  
本境所產之馬甚少其所應用者多由西北塞外購來較內地之  
所產尤良近年又有購自外國者曰洋馬軀幹高大惟富豪者畜之  
驢 似騾而小與牝馬交則產騾有黑白灰數色農家多畜之  
駝 長頸高脚背有肉鞍謂之駝峯可負橐囊又名橐駝今呼駱  
駝為反芻獸能任重而行遠沙漠地多用之

騾 似驢而大向不孳乳其耕田駕車代步與馬同惟駕轎車則  
專用騾其行甚速

羊 有山羊綿羊二種為反芻獸其毛為用甚廣其糞可以肥田  
山農多畜之



豕 俗呼為猪禮記豕曰剛鬣性愚蠢善掘土常輾轉污泥中體肥而富脂肪以糟糠飼之除其糞可以肥田外其肉專供食用  
犬 家畜也俗名曰狗能守夜故家家畜之

貓 禮記大蜡迎貓即此瓜銳其睛晝狹而夜圓善捕鼠故人家多畜之

黃羊 大於羊毛蒼黃昔有今少見

野猪 閩山有之今亦少見

狼 毛色似犬山野中間有之喜食肉其性甚猛故人多畏懼皮可為褥值最貴惟富家用之

獾 似狗而矮體肥行鈍皮宜裱其油可治湯火傷

貉 狀如狸性好睡其皮溫柔可以為裘

狸 即野貓也毛色蒼黃有斑點亦可作裘

狐 狐性疑色赤黃毛溫暖其腋為裘尤佳近年出產甚少價值

極昂

鼠 穴居之小獸也其齒甚銳善嚙物今所共惡故畜貓以撲之

鼯鼠 俗呼黃鼠狼又名騷鼠其皮可作帽其尾毫可以製筆

蝟 似鼠有毛刺脚短尾長物犯之則形縮刺張俗呼刺蝟皮入葯

兔 禮記謂之明眊山產最多前趾短後趾長善跳躍俗謂跳兔

毛輕而溫製造耳套者多用之

鱗介類

鯉 其肉鮮其味美為魚類之最上者諸河皆有之

鯽 一名鮒似鯉而小喜羣行其脊肉豐食之味稍遜鯉

細鱗魚 圓身細鱗多出山水細流處

烏子魚 頭尾皆尖身細色白

鱧魚 即烏魚圓而長鱗細色黑首有七點作北斗象俗呼黑魚

鮠 似鱧而大一名鱠身圓肉厚有黑白二色俗呼草哨魚

鮎 即詩之鱣頭大尾小身圓無鱗謂之鮎言其黏滑也

鱖 形狹而長鱗白而細其性浮俗呼白漂子

雷魚 小者如指色黑尋河兩岸而行雨多則有

沙鮠 青春白腹體圓有斑文俗呼沙網魚河水皆有之

船汀魚 長二三寸大頭闊口黃色有斑見人則以喙插泥中

鰾 無鱗有青黃二色生水泥中其形似蛇

鰾 爾雅謂之鰾鰾似鰾而短生水底泥中俗呼泥鰾

鰾 俗呼團魚又名腳魚甲入葯

蝦 棲於水內身被殼而多節屈伸自如善跳躍肉味鮮美可製

蝦油蝦漿人多食之

蟹 俗呼螃蟹前有二螯旁有八足時常橫行秋季其味最佳冬

季於冰中取出者謂之冰蟹可充鼎食

蛙 種類不一一名田雞初生為蝌蚪先生前足繼生後足脫尾

則成蛙矣雨後爭鳴俗名蛙鼓

昆蟲類

蠶 有山蠶家蠶二種家蠶食桑葉民國初年農業試驗場曾試育之卒以氣候不宜未收成效山蠶食柞葉醫巫問山間有育之者

土蜂 在地中作房者一名螺贏純雄無雌負桑蟲而為子即螟蛉也

黃蜂 其蜂黃色一名馬蜂結巢於屋檐下觸犯之輒以尾刺之射以毒汁左傳謂之蜂虿有毒者是也

蟻 種類甚夥大者曰蚍蜉小者曰螳俗呼麻蟻喜群居善戰鬥鬪時各有行列故謂之蟻陣

蟋蟀 一名促織俗呼趨趨似蝗而小棲黑色光澤如漆善跳好  
鬪秋晚則鳴爾雅謂之蟀又竈馬如促織好穴居於竈亦名竈雞  
阜螽 長角修股善跳作聲形色不一統呼麻蜡

螳螂 月令仲夏螳螂生俗呼刀郎深秋生子作房著樹枝上是  
為螵蛸

蜣螂 啖糞蟲也一名蝓蜣一名推車客俗呼使客螂喜轉糞為  
丸納於土坎子生其中

蝴蝶 形色大小不一皆蟲所化山蝶大如掌彩色斑斕子即山  
蠶也又花樹間蠹之大者暑時置熱石上輾轉久之即可化蝶

螢 一名熠燿今名螢火蟲月令季夏腐草為螢至夜有光士人

囊之借以照讀

蟬 楚謂之蜩別名曰蟾其種類不一振翼作聲其音清朗殼可入葯即蟬蛻

螻 一名蟻螻生糞土中性嗜果實大者可化為蟬則吸風飲露其清濁之變化有如此者

蚓 一名蚯蚓俗呼曲蟾其體由多節而成喜居土壤白頭者入葯

蜻蜓 爾雅謂之負勞俗呼螞蛉六足四翅翅薄如紗夏秋之間羣飛水際能捕食害蟲故大有益於田苗

尺蠖 似蠶而小促其腰使首尾相就乃能進步

蜘蛛 大者為蜘蛛小者為蟻子即詩之蠨蛸善於結網使飛蟲自懼捕而食之又於壁上作幕如錢者俗名壁錢

負蟠 即詩之伊戚俗呼濕生蟲

蟬 書中蟲一名蠹

蟾蜍 背多瘡磊喜居陸地

蠓 一名蠓凡草木葉有胞起中生小蟲即蠓胞裂蟲即飛出

水蛭 河池均有之其頭尖銳凡涉水者遇之輒刺入皮膚吸血俗呼馬蝗

蝸牛 爾雅謂之蜺蝓有殼無骨身藏殼內如旋螺狀頭部有觸角惟司感覺行時觸角搖動不息遇物則身匿殼中



螻蛄 穴土而居翅短腹大腰細如蜂俗呼土狗

蜈蚣 廣雅謂之蚘蛆春出冬蟄節節有足雙鬚歧尾最畏蜘蛛

蜘蛛以溺射之即斷爛

蟬 糞中蟲陰雨時生之體細而狹其翅有四朝生暮死

蠍 一名蠶其尾有毒螫人與蜂同人多畏之

蛇 種類不一大者往往有冠幘其短小名七寸者最毒

守宮 灰色伏居壁隙俗呼蠍虎以性喜食蠍故名

蜥蜴 一稱蝶螈常居草澤中俗呼馬蛇

蠅 有青蠅蒼蠅之分青蠅亂色蒼蠅亂聲牡者產蛆蛆化為

蠅污穢地最多人皆惡之

蚊 飛蟲也長吻如針刺人皮膚吸血即吐毒汁於吸處其飛有聲故名蚊雷夏秋之間人多設帳防之

虻 俗呼瞎虻亦草根所化似蠅而大夏季最多酷嚙牛馬行人苦之

蚰蜒 似蜈蚣兼赤黑黃色身細而長爾雅謂之蝮衍

毛蟲 即毛蠹一名蝟身背有五色斑毛大者約二寸許作椶灰色喜食樹葉其種類極多松椿榆等皆有之

叩頭蟲 本草綱目蟲大如斑蝥而黑色按其後則叩頭有聲故名叩頭蟲

河蛛 即水龜身長寸許有足二對羣游水上水涸則飛

豉蟲 一稱豉母本草綱目此蟲正黑如大豆浮游水上

浮塵子 一名黑翼蟲體極細與浮塵相浮上下故名浮塵子

蝨賊 食禾根者曰蝨食禾節者曰賊赤首黑尾身長而細

螟螣 食禾心者曰螟食禾葉者曰螣與蝨賊均為害苗之蟲農

家疾惡之

蚤 啣人蟲形小而黑跳躍甚速

蟻螂 啣人蟲牀竈間多有之

合  
大  
三  
一

鑛物

土硝 於斥鹵之地掃取其土熬之成硝有皮硝火硝之別

石灰 邑東北石灰窰村產青板石可燒石灰

雲母 本境閭山麓間有之

白粉石 邑東北塔子溝村南山土質如粉俗呼白土子

青灰 邑東北高士英屯東山土質青色可作染料居民多用之

碾磨石 邑西北三道溝村山石體質堅緻可作碾磨

珣玗琪 赤玉屬按爾雅石之美者有醫巫閭山之珣玗琪今此石無金銀銅鐵等鑛本境無多亦無採之者